

*Miho calidad di bida cu chens pa sigui ricibi kimoterapia of cirugia*

## Pa prome biaha pashent ta ricibi Stent Colorectal na Hospital

**ORANJESTAD** - Tres siman pasa e prome pashent a ricibi un stent colorectal na Aruba y e procedura tabata uno masha exitoso segun e team di “gastroenterologia” di Dr. Horacio E. Oduber Hospital. Dr. Edgar Caceres y Dr. Jreige cu ta e “gastroenterologo” nan di Dr. Horacio E. Oduber Hospital ta trahando hunto cu e departamento di oncologia pa yega na miho cuidu y tratamento pa pashentnan di cancer di colon na Aruba. E specialistanan ariba menciona y nan coleganan di

Departamento di oncologia ta pone hopi enfasis riba calidad di bida di nan pashent y pa cu esaki a studia e posibilidad pa introduccion di diferente “tratamento paliativo” cu por wordo haci na Aruba mes. Ta importante pa menciona cu e pashent cu a ricibi e “stent” y su curpa a bira mas fuerte tin mas chens pa sigui ricibi por ehempel kimoterapia of cirugia despues. Un keho cu un pashent di cancer di colon por tin ta obstruccion di tripa causa pa crecimiento di tumor. E obstruccion ta haci imposibel

pa e pashent bay af, e pashent ta debilita cual tin como consecuencia cu su tratamento di kimoterapia of cirugia no por tuma lugá. Introduccion di un “stent colorectal”, pues den e tripa/intestino, ta un di e formanan menos invasivo, mas eficiente y comodo pa asina brinda alivio na e pashent. E procedura di introduccion di un “stent” no ta rekeri cirugia y tin un duracion entre 40 minuut pa un ora. E ta un procedura lihe y sigur, segun Dr. Jreige. E pashent no ta sinti e presencia di e “stent” den su curpa, pero siguramente ta sinti e alivio cu esaki ta trece cun’e. E recuperacion ta lihe y den mayoria caso e pashent no mester keda interna despues di e introduccion. E por bay cas di biahá cu instruccionnan di su especialista pa loke ta trata control y cuidu, tratamiento di dolor y nutricion. Un “stent colorectal” ta un tubo masha chikito di metal special cirurgico cu ta parce “kippengaas”. E ta wordo introduci na e lugá cu ta obstrui den e pashent su



tripa pa medio di un “colonoscopia” cu ta wordo haci na Departamento di endoscopia. Ta posibel cu e ta wordo introduci via di un endoscopia tambe. E diseño di e “stent” ta haci posibel cu e ta completamente cera na momento di introduccion y e ta expande den e tripa pa pusha habri e tripa y asina haci posibel cu e pashent por bay af atrobe. Esaki ta un “tratamento paliativo”, pues e no ta cura e cancer di colon, pero si e ta haci posibel pa e pashent por come, por bay af y asina bira

mas fuerte pa un miho calidad di bida. Por kita e “stent” ora no mester di dje mas.

Dr. Jreige ta comenta cu antes tabata rekeri cirugia pa haci un “by-pass” of otro procesonan incomodo y di recuperacion largo pa e pashent por haya alivio, pero e introduccion di un “stent” ta miho pa e pashent. Asina Dr. Horacio E. Oduber Hospital ta sigui desaroya y ta innovativo pa implementa un miho cuidu y calidad di bida pa e pashent y cumpli cu e lema cu e pashent ta central. □

